



建陽縣之境之圖




建陽縣廓之圖



建陽縣儒學圖



建陽縣書坊圖



志目總序

夫縣有志邑史也維是建溪七閩上游厥土沃厥田
上上厥山川縈秀粵若有宋真儒接武文學彬彬埒
諸名邑邑舊有志條貫靡竟曠佚寔繁殊不類史作
自弘治甲子吾鄉先達區君來柄茲邑亦經修葺五
十年于茲今予承乏蒞治五稔於凡所當興革者畧
殫心力用叶化理公暇迺覽輿圖稽構乘弔古察俗
慮志久湮喟然嘆曰建邦以文獻名天下而邑乏志

厥責在予迺謀于邑博庸齋李君曉堂錢君仰山胡
君庠士盧生秉義陳生鵬余生鏗黃生一震王生應
山黃生一夔協力蒐羅合

大明一統志八閩通志郡志學志并舊邑志諸書校
刪裁輯補闕芟蕪爰據臆見竊倣司馬遷班固范曄
諸史科條彙萃先紀建置沿革次列四表十志二世
家百六十五列傳良以國邑雖異實錄奚殊鉅細兼
詳務俾核實庶可備徵考云

昔在黃虞分井作牧建國親侯至于成周制法等服咸五自秦罷侯置守裂天下而郡縣之於是封建法壞歷代相沿卒莫能復亦時勢然也然禹分九州廼稱玉帛萬國周室藩屏亦云千八百國之君是知侯牧雖殊地無廣狹試以滕薛侯封度長絜大曾不能一縣也建陽北通崇安西接武陽東南抵于甌浦征賦所及蓋二百里而遙制爵則五等無列計地則大國不侔古者列國各有史官掌記時事余亦倣編年

標建置述沿革首作縣紀

孔子序尚書記事或闕其年月及春秋編年則於時月日詳言之亦信以傳信疑以傳疑耳舊志無職官選舉諸表蓋自宋元間已不能備訂近代文物邈若太古識者恨之失今不傳後聞無祖亦猶今之視昔也爰是旁搜博采掇拾所聞以備省覽畧依漢史次作年表

夫史列編年志述體要必綱提領挈源析委分以類

載記也建陽提封萬井式廓日增經野辨方疆界正
矣設險示坊藝極陳矣故志封域有封域則形勝之
所萃利賴之所歸也故志山川廣谷大川異制民生
異習風氣異宜故志風俗設官分職以爲民極必奠
厥攸居而後政令有所自出也故次之以治署然國
保於民生齒蕃矣民物阜矣賦役不可以不均故次
之以戶賦民出賦役以共其上上之人亦必備預不
虞而閔其疾苦也故次之以儲恤民食足而後教化
行於是志學校學校圖書之府禮義之區也貞教而
後明禮禮莫重於祭於是志秩祀載諸祀典者必有
文文以足志志以足言故作藝文以垂不朽乃若古
蹟亭閣先賢丘墓寺觀祥異皆足以供勝覽起瞻思
而備采擇弗可遺也故以雜志終焉

昔史遷序帝王則曰本紀公侯傳國則曰世家孔子
一魯司寇耳無五等可列而云世家者以其德教遠
被雖群后不足比並建自孫吳裂邑其壤賦不登於

禹貢瑞帛不輯於周庭故無世家可述惟朱子卜居
考亭倡明正學而集諸儒大成蔡氏淵源家學三世
一轍而衍孔孟正脉於是作朱蔡二世家

傳者傳也古人註釋經義羽翼聖哲曰傳至於班馬
而下表記人物亦謂之傳無非以章往訓來傳諸不
朽也余閱建寧人物傳於建陽而得六十六人皆足
以振芳聲於一時垂休光於後世者予竊慕焉遂為
論列以附于後而續以儒林宦蹟列女并流寓方伎
僭加品藻用以告乎官於斯產於斯者備鑑識焉

縣紀

自縣治至府一百二十里至省五百里至南京二千二百三十一里至北京五千一百八十八里

建陽縣古百粵地在禹貢屬揚州之域周時七閩雖入職方然無諸荒徼賓貢弗通羗邑部落漫無攷證逮秦罷侯置守始以其地隸閩中羗漢初羗廢孝武徙其民而墟之久而逃亡漸集生齒寔繁立為冶縣屬會稽郡東漢光武分屬會稽南部于時建陽本建安縣桐鄉地尚未置縣三國孫吳時廼析為建平縣厥後代有沿革今述其建置大端俾吏茲土者知所攷焉作縣紀

漢建安十年吳遣賀齊討上饒而立建平縣

吳永安三年以會稽南部與建安郡析建安桐鄉地

置建平縣

晉元康元年以建安郡屬江州仍領建平縣

太元元年改建平為建陽

隋開皇九年建安郡廢為縣屬泉州建陽併屬建安

唐武德四年改建安為建州復置建陽陞為上縣

八年以建州屬泉州都督府省建陽入建安

嗣聖五年復置建陽

今建忠里保太寺基即縣治也時崇安立為溫嶺鎮管十

五里亦屬之建陽至宋太宗淳化五年始陞崇安場為縣自黃亭分界夾於兩縣之間至今呼

黃亭地方對面為故縣考諸唐書武夷山載在建陽則彼時崇安屬建陽明矣

中和四年以陳巖為觀察使鎮福州表罷人熊博

為建州刺史寓治建陽

宋治平三年析建安建陽浦城三縣地置甌寧縣

元祐四年析建安地半復置甌寧縣建陽浦城地

不復與

建炎二年建州率葉儂叛知州事方承移寓建陽

四年七月建州范汝為作亂建陽縣廨宇皆

燬

紹興元年正月前御史臺棺法官謝嚮率范汝為

討平建陽賊劉時舉六月崇安民廖公昭

合汝為餘黨熊志寧作亂既散志寧復與

建陽民丁朝佐合兵陷二縣八月謝嚮移
軍福州討之

二十一年知縣傅穎重建建陽縣縣治

景定庚申嘉禾產於縣之唐石里 詔改建陽縣

曰嘉禾

元復嘉禾縣爲建陽縣

至正二十二年壬寅陳友定據福建行省稱僞漢
移寨建陽之開福寺

建陽縣志卷之一

二十

游

國朝洪武元年戊申陳友定歸附縣仍其舊隸福建
布政使司建寧府編戶二百八里今減二
里在坊二十八里在鄉一百七十八里總
三坊十六里爲一十九里

按舊志宋設六鄉洪武十四年併爲五鄉
一十九里

建陽縣志卷之一